



Nova hidžretska godina – radost i zahvalnost na blagodatima (Medina)

Hatib: dr. Ahmed ibn Ali el-Huzejfi

2. muharrem 1447. po Hidžri / 27. juni 2025.

Hvala Allahu, Koji određuje sudbine, upravlja stvarima i mijenja stanja i vremena. On je u dane, mjesece i godine utkao mudrosti i pouke, i Svojim robovima darovao blagodati koje raduju oči i smiruju srca.

Svjedočim da nema boga osim Allaha, Jedinog, Koji nema sudruga, svjedočenjem koje potvrđuju srca, izgovaraju jezici i koje osvjetljava stranice dobrih djela, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik, poslan s uputom, milošću i svjetlom. Neka su salavat i selam na njega, na njegovu porodicu, ashabe i sve koji ih slijede do Dana obračuna.

Poštovani vjernici! Bogobožnost i strahopoštovanje prema Allahu, u tajnosti i javnosti, jeste najčvršći put ka Njegovom zadovoljstvu i najprostraniji ulaz ka Njegovoj milost. To je trgovina koja nikada ne propada, opskrba koja ne presušuje, radost koja ne prestaje – užitak ovog svijeta prije vječnog užitka na ahiretu. Uzvišeni kaže: "O vjernici, ako se budete Allaha bojali, On će vam sposobnost darovati pa ćete istinu od neistine moći rastaviti i preko ružnih postupaka vaših će preći i oprostiti vam. A Allahova dobrota je neizmjerena." (El-Enfal, 29)

O vjernici i vjernice, brzina prolaska dana i godina nosi pouku za one koji razmišljaju. Vjernik se osvrće na prošlost i promišlja o budućnosti, jer zna da će današnji dan postati jučerašnji, a današnja buka pretvoriti se u tišinu. Koliko samo sadašnja godina sliči onoj prošloj, i koliko sadašnji dan sliči prošlom danu! Događaji se ponavljaju poput okretanja mlinskog kamena i traju onoliko koliko traje jutarnje sunce.

To je Allahov zakon u kosmosu i stvaranju: ništa ne ostaje isto, niti traje vječno. Život se okreće i mijenja sve dok ne dođe kraj i susret s Allahom, kao što Uzvišeni kaže:





“Nama će se oni zaista vratiti...” (El-Gašija, 25)

“... a Gospodaru tvome će se, doista, svi vratiti!” (El-Alek, 8)

Dok ispraćamo staru hidžretsku godinu i zatvaramo njene stranice, u isto vrijeme dočekujemo novu s nadom i optimizmom.

Ispraćamo staru godinu sa svim onim što smo pohranili u nju od dobrih (iskrenih) namjera, riječi i djela.

Zajedno s proteklom godinom ispraćamo jednu veliku i blagoslovljenu sezonu dobra, u kojoj je Allah muslimanima darovao priliku da obave jednu od najuzvišenijih islamskih dužnosti i temelja vjere, a sada dočekujemo blagoslovljenu sezonu Allahovog mjeseca muharrema, u neprekinutom nizu dobra, koje se niže jedno za drugim, u vremenskom slijedu punom bereketa.

To je mjesec za koji je Allahov Poslanik, sallallahu alejhi ve sellem, rekao: “Najbolji post poslije ramazana je post u Allahovom mjesecu koji nazivate muharrem, a najbolji namaz poslije farza je noćni namaz.” (Muslim)

Ovaj hadis jasno ukazuje na to da je post u mjesecu muharremu najbolji dobrovoljni post nakon ramazanskog posta, a da je najbolji dobrovoljni namaz noćni namaz.

Poštovani vjernici! Allah vas je počastio da posjetite ova blagoslovljena i sveta mjesta u ovom odabranom i časnom vremenu. On je nadahnuo vaše vođe da se brinu o ovim svetinjama i njihovim posjetiocima, na najbolji mogući način, u ambijentu sigurnosti, mira i blagostanja.

Zato, osjećajte veličinu ove blagodati i zahvaljujte Allahu na njoj. Poštujte svetost ovih mjesta, slijedite sunnet Poslanika, sallallahu alejhi ve sellem, i upućujte dove za one koji se brinu o ovim svetinjama.

Allahu naš, nagradi one koji služe Dvama časnim haremima, posebno Čuvara Dvaju harema i njegovog prijestolonasljednika, najljepšom nagradom na dunjaluku i ahiretu. Zaštiti ih Svojom zaštitom i obaspi ih Svojom milošću.





Allahu, primi hadž od hadžija, vrati ih njihovim porodicama s oproštenim grijesima i trgovinom koja neće propasti. Primi dobra djela svih muslimana i ispuni njihove lijepe nade, o Ti Koji si najplemenitiji.

Allahu, popravi stanje muslimana širom svijeta i pomози ih protiv njihovih neprijatelja.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

